

Ummah patut ambil berat kebajikan saudara seagama

Memakmurkan negara bukanlah satu tanggungjawab enteng, bahkan untuk menjadi umat berkualiti dan menghimpun ummah yang dihormati memakan masa berpuluh, malah beratus tahun lamanya.

Dalam usaha itu, setiap individu Muslim haruslah memantapkan siasah dan menekuni jihad kehidupan dunia untuk kesejahteraan di akhirat serta merealisasikan wawasan agama dan negara.

Tanggungjawab memakmurkan negara bukan terletak di pundak pemimpin saja, tetapi amanah setiap rakyat.

Umat Islam khususnya perlu sentiasa mengambil berat soal kesejahteraan, keamanan, keharmonian, diplomasi, kesepakan dan ikhlas terhadap perjuangan menyatupadukan warga negara bagi membentuk kehidupan harmoni.

Alangkah indah andainya setiap seorang di antara kita mengambil berat soal kebajikan saudara seagama

sehingga setiap rakyat turut memainkan peranan sebagai pemimpin kepada ahli masyarakat yang lainnya.

Allah SWT berfirman: *"Dialah yang menjadikan bumi bagi kamu mudah digunakan, maka berjalanlah di merata-rata ceruk rantau serta makanlah daripada rezeki yang dikurniakan Allah dan ingatlah kepada Allah jugalah (tempat kembali kamu sesudah) dibangkitkan semula (maka hargailah nikmat-Nya dan takutilah kemurkaan-Nya)."* (Surah al-Mulk, ayat 15)

Manusia dilantik sebagai khalifah untuk mengurus tadbir dunia dengan sempurna, bukan memusnahkannya. Jika berlaku pencerobohan hak setiap makhluk Allah SWT, wajiblah kita kembali kepada Allah SWT dengan memohon keampunan dan taubat.

Firman Allah SWT: *"Dialah (Allah) yang menjadikan kamu dari bahan-bahan bumi, serta menghendaki kamu memakmurkannya. Oleh itu mintalah*

ampun kepada Allah dari perbuatan syirik kemudian kembalilah kepada-Nya dengan taat dan tauhid. Sesungguhnya Tuhan sentiasa dekat lagi sentiasa memperkenankan permohonan hamba-Nya." (Surah Hud, ayat 61)

Ketangkasan berfikir untuk menyelesaikan sebarang masalah membabitkan perselisihan antara umat Islam, mengelak masalah rendah akhlak, menjauhi skandal dan tidak bersekutu dengan pihak yang menolak wahyu melambangkan keperibadian khalifah di bumi yang dilantik Allah SWT.

Permusuhan dan persengkeatan hanya membawa misi kegagalan, bahkan memalukan, apatah lagi dengan gelaran khalifah yang dikurnia Allah SWT.

Kita seharusnya sedar bahawa setiap apa yang dilakukan di dunia adalah

untuk mendapatkan keredaan Allah. Setiap komitmen untuk memajukan diri serta membangunkan modal insan mestilah berpaksikan hukum supaya kita tidak tersilap mengatur langkah.

Selain itu, setiap individu mestilah menanam tekad dan hasrat untuk membawa diri selurus-lurusnya mengikut landasan yang dibina Rasulullah SAW dan khulafa' sesudahnya dengan susah payah.

Tiada apa yang boleh dibanggakan di dunia ini melainkan semuanya perhiasan semata-mata, bukan ia tidak boleh dimanfaatkan, tetapi biarlah membawa keuntungan kepada diri sendiri yang tidak akan dibantu oleh orang lain sewaktu hari perhitungannya.

Dengan mendekatkan jurang peribadi setiap Muslim supaya mengikut qudwah hasanah Rasulullah SAW, sahabat dan wanita beriman yang hampir dengan Baginda, umat Islam mesti mengisi dada serta hiasi

personaliti dengan ilmu, nilai murni yang mengangkat darjah ummah menjadi lebih baik.

AL-QURAN

"... Mintalah ampun kepada Allah dari perbuatan syirik kemudian **kembalilah kepada-Nya dengan taat dan tauhid**"

Surah Hud (ayat 61)



NIK SALIDA SUHAILA

Pensyarah Kanan
Fakulti Syariah dan
Undang-Undang
Universiti Sains
Islam Malaysia